

Gobierno cu bunita proyecto iniciativa di Maybeline Arends-Croes pa uni e famianan

Lo cende un kerstboom den diferente districto di Aruba

DURANTE conferencia di prensa di Gobierno ayera mainta, Robert Maduro, coordinador di un bunita proyecto a duna informacion riba esaki. Den e siman di 14 pa 17 di december den 8 diferente districto na Aruba lo cende un kerstboom pa trece e alegria y luz di Pasco bek den cada districto y bario di Aruba. Maduro ta conta cu e proyecto aki a sali for di Maybeline Arends-Croes y Gobierno a duna tur su cooperacion pa realizacion di esaki.

Dialuna 14 di december lo cende e kerstboomnan na Noord y Tanki Leendert, diamars 15 di december lo cende esunnan na Paradera y Santa Cruz, diaranson 16 di december esunnan di Oranjestad y Pos Chiquito y diahuebs 17 di december lo cende esunnan di Savaneta y San Nicolas.

Cada Minister formando parti di Gabinete Mike Eman I lo ta encarga pa cende un kerstboom den e diferente districtonan aki.

E actividad ta planea pa cuminsa tur e dianan pa 7'or di anochi y

termina pa 9'or. Rond di e actividad aki lo tin un ambiente festivo unda cu grupo di Maybeline y su coro Tuti Fruti y otro agrupacionnan di musica navideño manera gaita y aguinaldo lo haci nan presentacion tambe.

Robert Maduro a pidi pueblo di Aruba pa asisti na e actividad aki cu ta pa trece e famianan hunto y tambe pa mostra e sentimento di alegria, paz, tranquilidad y harmonia cu kier refleha pa e temporada di Pasco cu ta biniendo.

A pesar cu e tempo pa organiza e actividad aki tabata hopi cortico, toch a logra esaki cu cooperacion di diferente instancia manera ta Departamento di Cultura, DOW y otro organizacionnan.

Durante e actividad aki tin oportunidad tambe pa trece articulonan pa e personanan menos afortuna den e bario. Aki ta papia di por ehempel paña, cuminda y otronan pa asina traha un basket. Lo bay tin un persona di Asuntonan Social cu ta encarga cu esaki.

Maybeline Arends-Croes di su banda a comenta tambe riba su

bunita iniciativa. El a conta cu 20 aña pasa tabatin un proyecto igual cu tabata hopi exitoso. Mirando cu pa hopi aña esaki no a wordo haci mas, e tabata conversa cu Sra. Alice y a bise pa bin cu e idea aki bek y Alice a bise cu el lo yama Robert pa wak kico por haci. Awor ta asina leu cu lo pone un kerstboom grandi den tur bario pa cende y e idea ta pa tur famia henter conhuntamente celebra den nan propio bario e cendemento di luz y unda e gruponan di e bario por haya chens pa por canta, balia, declama of cualkier otro presentacion.

E locacion exacto di e kerstboomnan tana cura dimisa di Santa Ana na Noord; na Tanki Leendert e lo ta na e parkeerplaats di misa Monte Calvario; na Paradera ta pabu di Aruba Bank Paradera; na Santa Cruz ta na e parkeerplaats pariba di misa; na Oranjestad e lo ta dilanti di refreskeria Italia banda di Elmar; Pos Chiquito ta pabou di e keuringslocal; na Savaneta ta dilanti di Wintergarden Supermarket; y San Nicolas ta na e parkeerplaats di Teresita Center. A escohe e lugarnan aki basa riba consejo di DOW, Kadaster



y Elmar. Pero tambe a busca e lugarnan caminda tin menos decoracion di Pasco y tambe lugarnan cu ta mas accesibel.

John John Flemming di Departamento di Cultura ta bisa cu intencion di e actividad aki ta pa e famianan por sinti nan mes orguyoso di por tin un kerstboom den nan bario, cu nan por bishite. Durante e dianan di cendemento di kerstboomnan lo bay tin tambe bar y cushina cu lo bende cumindanan en conexion cu temporada di Pasco.

E gruponan cu lo presenta na

e actividadnan ta como lo siguiente: na Noord lo tin grupo Katatumbito di 7'or pa 8'or y di 8'or pa 9'or lo tin Katatumbo. Na Tanki Leendert lo tin coro Tuti Fruti y coro Niño Divino. Na Paradera lo tin grupo Tuti Fruti y grupo di gaita Sensacionales. Na Santa Cruz tin gaita Exclusivo y gaita Exitante. Na Oranjestad lo tin grupo Arugaldo y grupo Fortaleza. Na Pos Chiquito lo tin Los Sobrinitos y grupo Paranda ta Nos. Na Savaneta lo tin grupo Gaita.com y grupo Goza Gaita. Na San Nicolas lo tin coro Niño Divino y grupo Nos cu Nos.